



Naunaipkutaq Titiraq

Havauhikhait Uqaqtip Maligaliurvingmi

Ukiuq 1377 atuqtillugu, Sir Thomas Hungerford hivulliqpaanguyuq Uqaqti talvani England-mi Maligaliurvianit. Avatquumablutik 600 ukiut, una havaaq akhuurluarnaqtuq niruaqtittiyunit maligaliurvingnit nunaryuami tamaat.

Ingilraarnit, havaakhait Uqaqtip amirnaqtuugaluaq. Taapkua Maligaliurviit ayuqhaqhutik ataniqtuqtuiyumablutik, Uqaqtit taapkua hivuliqtinit ihuigiyaugaangat piyauliqpaktut. Taimani kihimi, taamna hivulliq Uqaqti tuqtauhimayuq niaquiqtaubluni 1410-mi.

Ublumi, havaakhaita Uqaqtip Kanatami Maligaliurvingnit havaakhatqiktuq ataniqtuqtuivakhutiglu. Kivgaqtiublunilu Maligaliurvingmut, taamna Uqaqti ihumagivagaat havakviat taimaa niruaqtauhimayut maligaliurvikhaat katimatjutigiblugit. Taamna Uqaqti munaqhivaktuq aulapkainianik atuqtittivakhunilu *Maligakhaliuqhimayut Maligaliurvingmut*, munaqhivakhunilu havauhiinik talvani Maligaliurvingmi. Ikhivautaubluni Atannguyanut Ikayuqtinullu Katimayinut, Uqaqti munaqtiulluaqtuq titiraliqinirmik Titirarvianit Maligaliurviup ataniqtuivakhunilu Maligaliurvingmi.

Maligaliuqtit Maligaliurvingmit niruaqtittiblutik Uqaqtikhamik tikkuqaqpektut hivulliqpaami niruaqtautaaraangamik. Taamna Uqaqti havaktitauvaktuq angmaumagaangat Maligaliurvik.

Taamna Uqaqti munaqhivaktuq havaakhainik Maligaliurvingmi Maligakhaliuqhimayut malittiaqublugit, pinnguaqhuni, ihuaqtukkut, taimaa munaqtitut Maligaliurvingmi. Taamna Uqaqti nibliqtailiyukhaq pittailiyukharlu ihumaaluutigiyayununut Maligaliurvingmi.

Havaakhalluangi Uqaqtip Maligaliurvingmi titiraqhimavut ataani:

- Kivgaqtiubluni taiyauhimabluni Maligaliurvingmut;
- Kivgaqtuqhugit Maligaliurvik Kanatami nunaryuamilu ahini;
- Ikhivautaliubluni katimatillugit Maligaliurvingmi naalaktiubluni;
- Malittiarahuaqhugu *Maligakhaliuqhimayut Maligaliurvingmut*;
- Aulattiaqtittibluni Maligaliurvingmik;
- Ikhivautauluni katimagaangamik Atannguyat Ikayuqtiillu Katimayiinut;
- Aulapkaiblutik, tikkuaqtaugaangat Atannguyat Ikayuqtiillu Katimayiinit, taapkualu *Maligaliurvik Aulapkaiyiryuallu Katimayiit Maligait*;
- Angiqatigiingnahaqhutik kaantulaaktittinirmut kivgaqtuqhugu Maligaliurvik; imaalu
- Tikkuuqtiublutik titiraqtikhanik havaktikhaniglu Maligaliurvingmut.

Maligaliurviup Havaktiittauq Ikhivatillugit taapkua:

Tuglia Uqaqti

Taamna Tuglia Uqaqtip tikkuaqtauvaktuq Maligaliurvingmit. Tuglia Uqaqti hakugingniqaqtuq havaakhaqaqhunilu Uqaqtitut taamna Uqaqti huittaraangat, pilaitkumiluunniit. Taamna Tuglia Uqaqti Ikhivautaliuvaktuq Katimayiralaanut tamatkiumablutik.

-

Tugliit Ikhivautalgit Katimayiralaanut Tamatkiumablutik

Malruk Tugliit Ikhivautaliup Katimayiralaanut tikkuaqtauvaktut Maligaliurvingmit. Tugliit Ikhivautalgit ikhivautauvaktut Katimayiralaanut taamna Ikhivautalik huittaraangat.